

COMUNICATO n. 1900 del 07/07/2025

Infrastruktùrn un mobilitét, ditza hatta khött Fugatti atz Folgrait

Zimbar Hoachebene mearar baz 26 mildjü arbatn

[Cimbro] 'Z soinz di arbatn aftn provintziàl bege 133 von Laaz - 12.750.000 euro in gântzan vor di zboa toaln, dar earst iz sa khent apaltàrt – da gröazarste infrastruktùrn azpe khost augehaltet vodar autonome Provìntz vo Tria vor da Zimbar Hoachebene. In gântzan izta khent vürgelekk z'zera 26.437.437,94 euro in ditza gèlt steata drinn: auzpezzarn in bege SS 350 in tòkko vo Kalià atz Folgrait, in bege SS 349 vodar Frikka zbisnen Pian dei Pradi un di galeria un darzuar herrichtn 'z khirchle vodar Madonna Pelegrina aftn Sommo. Ditza hatta khött dar vorsitzar vodar autonome Provìntz vo Tria Maurizio Fugatti verte azta iz gest dar setz vodar djunta atz 4 von höbiat atz Folgrait vorà in pürgermaistar Michael Rech.

“Bar bölln machan bizzan di arbatn untargelekk vodar provintzial Vüarom vor bazta àgeat di infrastruktùrn un vor di mobilitét zo pinta da Zimbar Hoachebene pittn teldar Lagarina un Sugàna un pinn Veneto. Ditza iz eppaz boda di Hoachebene hatt starch mângl, ditza iz daz sèll bodaz iz khent gevorst von kamöüschaftn vo Folgrait, Lavròu un Lusérn zo tüana vor earst un zo schupfa azta dise bichtegen lentar vor in turismo di umbèl un di ekonomì vo pèrge von gântz Trentino, mang gian vürsnen hèrta pezzar” asó hatta khött dar Fugatti.

Dar vorsitzar hatt àgeheft zo reda von earst toal von Laaz, boda iz khent gelekk a gara da vorgännate boch. Dar earst tòkko vodar arbat S-136 “Auzpezzarn un betarn in provintziàl bege von Laaz (8.583.500 euro arbatn,

darzuar pitt àndre 3.226.100 azta beratn impreviste un vor àndarz) lekk vür zo richta khurtze tòkkn boda soinz drà nidarzorütscha un zo betra drai khearn boda soinz perikolosat, un zo macha a galeria boma mage gian lai in nidarbart vo 255 mètre, anvétze di zboa stòregen stöll bartn khemmen gehaltet asó azpe sa soinz un mang khemmen gemacht lai in aubart.

Dena dar zboate toal bart àgian zöbrest, sèmm boda dar Laaz rift atn bege SS 349 afte Hoachebene vo Lusérn boda bart khemmen gemacht an umkhear.

Ma paitet, anvétze, ke auz pan djar (gara auz pan 2026) saibda dar esekutif prodjèkt vor di arbatn S-984 – arbatn zo pezzra un zo sichra in bege SS 350 vo Folgrait atz Besenèll (4.924.292,54 euro).

Ma bart pezzarn da earst galeria dòpo Dietrobeseno un dena an naüing bypass zoa maga garedegarn da malamentar khear lai auz von stoll.

'Z barta khemmen zo khosta 6.113.430,30 euro di arbat n. S-1024 “Richtn un betarn in bege SS 349 zbisnen Pian dei Pradi un di galeria Fricca” Disa arbat iz drà zo khemma prodjèktart. 'Z zil iz daz sèll zo betra in gântz bege un vortzonemma a drai khearn zoa azma mage viazarn destrarn un mearar sichar aftz disan bege boda pintet di Hoachebene pittar hoachebene vodar Vigolàna, pittar Valsugàna un pitt Tria.

Antànto gianda vürsnen di arbatn zo sichra, zuar in pèrge, in bege SS 350 vo Folgrait zuar in Astetal (arbat n. S-1057, vor 366.000 euro) boda atz 12 von hornung von 2024 izta gest abekhènt dar kròtz.

Antànto geatma vürsnen zo studjara di arbat n. S-1079 - machan an umkhear aftn bege SS 350 atz Ekken vo Folgrait (1.000.000,00 euro) – 'z zil iz sicharn in bege pittnar umkhear boda zuargitt zo pasara zovuaz un

gelaüchteget azmada sege garècht – un no di arbat n. S-1050 zo macha an vuaz bege atz Gasperi zoa azta di laüt mang gian sichar aftn bege SS 349 atz Lavròu (1.298.715,10 euro).

Vor bazta ågeat, anvétze, ziviln arbatn saitma drå nidazolega in tèknesche ekonòmesche prodjèkt z'sega biz iz möglich herrichtn 'z khirle vodar Madonna Pelegrina aft Sommo djoch (50.000 euro).

Übarsetzt von Schaltarle vor di zung von Toalkamou vodar Zimbar Hoachebene

(cdt)